

ՔԱՆՈՆ ԺՈՂՈՎՐԴԱԿԱՆ ՆՈՒԱԳԱՐԱՆԸ

ԼԻԼԻԹ ՄԱՆՈՒԿԵԱՆ

ՄՈՒՏՔ

Սոյն ուսումնասիրութիւնը նուիրուած է Հին դարերից մինչ օրս Հայոց երաժշտական կեանքում կենցաղավարած ժողովրդական գործիքներից մէկին՝ քանոնին: Անդրադարձն այս թեմային թելադրուած է Հայ երաժշտագիտութեան բաց թողնուած էջերից մէկը մասնակիօրէն լրացնելու ցանկութեամբ:

Քանոնը սեղանածեւ (երկու ուղիղ անկիւններով) իրանով, փայտեայ ծածկով, իսկ ուղղանկիւն մասում՝ կենդանական թաղանթով երեսպատուած գործիք է: Նրա ստորին կողմը 85-90 սմ. է, վերին՝ կարճ կողմը՝ 35-40 սմ., ուղիղ անկեան կողմը՝ 42 սմ. բարձրութիւն ունի եւ սուր անկեան կողմը՝ 60 սմ.: Սովորաբար պատրաստուած է լորենու, ընկուզենու կամ եղեւնու փայտից: Գործիքի վերին դեկան ունի երեք խոշոր անցք, որոնք զարդաքանդակների տեսքով ծառայում են որպէս *ռեզոնատորներ*: Աջ կողմում ձգւում է *կաշին*, որի վրայ դրւում է գործիքի *յեւակը*, վերջինս սովորաբար լինում է 4 ոտքանի, Հագուադէպ՝ 3: Գործիքի ձախ կողմում գտնւում են *ականջները* (թուով 72) բռնակները (մանդալներ, թուով 78), որոնց միջոցով կարգաւորւում է քանոնի լարուածքը եւ հնչիւնաչարի դասաւորութիւնը: Քանոնի *լարերի* թիւը մշտապէս տատանուել է. այսօր հիմնականում 72 է (մասնաւոր դէպքերում 76 կամ 78), որը եռակի բաժանուած է 24 ձայնի: Քանոնը կամիթային գործիք է, լարերին հպւում են ոսկորային նիւթից պատրաստուած յատուկ յարմարանքի՝ *մեղխատորի* միջոցով: Մեղխատորները մատներին «հագնում» են *մատնոցներ* օգնութեամբ: Գործիքը լարելու համար օգտագործւում է *բանայի*, որն ամրանալով ականջներին եւ դրանք պտտելով, ձգւում կամ թուլացնում է լարը: Քանոնի 24 ձայնից իւրաքանչիւրն ունի 3 լար, ամէն լարախումբ՝ երկու բռնակ, որոնք ձայնը 1/2 տոն բարձրացնում եւ իջեցնում են: Գործիքի հնչիւնածաւալը 3 եւ կէս օկտաւա է՝ c - e³: Լարւում է «ռէ» տոնայնութեամբ (հնարաւոր են բացի in D լարուածքից նաեւ in C, in G):

ՊԱՏՄԱԿԱՆ ԱԿՆԱՐԿ

Հայկական ժողովրդական գործիքների ծագման եւ զարգացման վերաբերեալ պատմական յիշատակութիւնների ենք հանդիպում Հին մատենագիրների վկայութիւններում: Գործիքների անուններ լայնօրէն թուարկուած են յատկապէս Աստուածաշնչի հայերէն թարգմանութեան մէջ:

Սուրբ Գրքում եւ վաղ միջնադարեան պատմիչների երկերում յիշատակում են եւ լարային, եւ հարուածային, եւ փողային գործիքներ՝ տաւիղ, քնար, ջնար, վին, բամբուռ, փանդիւռ, սրինգ, փող, թմբուկ, զանգակ, պարկապոզուկ, շեփոր, գալարափող, երգեհոն (հարմոնիք), ծնծղայ, սաղմոսարան, շուփ, դափ, ուղ եւ չաշտա: «Եւ Դաւիթ եւ որդիքն իսրայէլի խաղային առաջի Տեառն տաւղօք եւ նուագարանօք զօրութեամբ, եւ երգովք եւ քնարօք եւ սրնօք եւ թմբկօք եւ ցնծղայիւք եւ փողովք» (Բ. Թագ. Գլ. 2-5): Պատմահայր Մովսէս Խորենացին վկայել է, որ Տիգրան Մեծին գովերգում էին բամբուռի նուագակցութեամբ¹: Մէկ այլ տեղ յիշատակում է «Ջնարահար քաջամատն կնոջ», որին խնջոյքի ժամանակ հետապնդում էր հարբած Խոսրով Գարդմանացի իշխանը²:

Հայաստանում քանոնի նախատիպար են տաւիղը, ջնարը եւ քնարը, որոնք կիրառութեան մէջ են եղել անյիշելի ժամանակներից: Յայտնի է, որ հեթանոսական Հայաստանում մեծ ժողովրդականութիւն են վայելել գուսանները: Լինելով ժողովրդի հայրենասիրական յոյզերի արտայայտիչը, նրանք երգերի միջոցով բանաւոր փոխանցել են թագաւորների ու աստուածների սիրանքներին վերաբերող զրոյցները: Բացի այդ, գոյութիւն են ունեցել նուագորդներ, առանց որոնց չի անցել ոչ մի պալատական խրախճանք, ինչպէս նաեւ ժողովրդի կեանքի անբաժանելի մասը դարձած ծիսակատարութիւնները՝ հարսանիքը, թաղումը եւն.: Մեր թուարկութիւնում գործիքային երաժշտութիւնը մեծ կիրառութիւն է ունեցել եւ զարգացածութեան որոշակի աստիճանի հասել ի դէմս թատրոնի, որը յատկապէս յունական թատերախմբերի միջոցով, իր խաղացանկով եւ նուագախմբով հանդերձ մեծ ծաղկում է ապրել Տիգրան Բ-ի եւ իր որդի Արտաւազդ Բ-ի արքունիքում (մ.թ.ա. Ա. դար):

Քանոնի պատմութիւնը, նրա զարգացման ընթացքը որոշակիօրէն ուրուագծւում է, երբ համադրւում են հեթանոսութեան ժամանակներից պահպանուած կիրառական առարկաների (յետագայում տապանաքարերի վրայի) փորագրեալ պատկերները, պատմիչների արժէքաւոր վկայութիւնները եւ ձեռագրերում առկայ մանրանկարները, որտեղ առկայ են գործիքի թէ՛ մենանուագ եւ թէ՛ անսամբլային պատկերումներ: Քանոնատիպ նուագարանի գոյութեան ամենավաղ վկայութիւնը՝ պեղումների շնորհիւ հեթանոսական ժամանակներից մեզ հասած, ժողովրդի երաժշտա-առասպելական պատկերացումներից դրսեւորուած կրիկեան մի գեղեցիկ հայկական արծաթեայ թաս է: Դրա կենտրոնում պատկերուած է Դաւիթ արքան՝ ձեռքին տասնադի անկիւնաւոր նուագարան բռնած, իր երգից քարացած դազաններով ու սիրելի կնոջով շրջապատուած³: Դաւիթի ձեռքի գործիքը կարծես տիպիկ փոքրիկ քանոն լինի, որը սակայն դրուած է ծնկներին: Դա տաւղի անկիւնաւոր տեսակն էր, որը Ծ. դարի առաջին

կէսից կնքուեց նոր՝ սաղմոսարան անուամբ: Գործիքը քանոնատիպ կատարման եղանակով պատկերուել է աւելի ուշ շրջանի մանրանկարիչների գործերում:

Երաժշտագէտ Նիկողայոս Թահմիզեանի գիտական պրպտումները յանգեցրել են քանոնի արեւելեան ծագման դրոյթին: Այն փաստուում է մ.թ.ա. Բ. հազարամեակը գնացող չինական «սէ» գործիքի մասին մ.թ.ա. Ը. դարում պահպանուած գրաւոր վկայութեամբ: Նոյն դարում դրանց նախատիպերի երկու նմոյշ փորագրուած են փինիկեան մի արկղիկի վրայ. դրանց ազգակից են եղել նաեւ Հին հրէական տասնադի «ASOR»-ն ու «nevel»-ը⁴:

Հայաստանում քանոնի նախատիպերի առաջին գրաւոր յիշատակումներին հանդիպում ենք Ծ. դարի հայ պատմիչների երկերում՝ որպէս ջնար, քնար կամ տաւիղ: Յայտնի է, թէ այդ գործիքները համոյթային ինչպիսի յարաբերակցութիւններով են հանդէս եկել եւ ինչ երաժշտութիւն են կատարել: Տեղեկութիւններ չեն պահպանուել նաեւ հեթանոսական թատրոնների նուագախմբերում կատարուած երաժշտութեան մասին: Քրիստոնէութեան ընդունմամբ գործիքային երաժշտութիւնը նահանջ ապրեց, կասեցուեց դրանց գրանցման եւ յետագայ սերունդներին փոխանցման հնարաւորութիւնը: Նոյնիսկ մինչ օրս հնագոյն միանման գործիքների միջեւ տարբերակման գծերը յստակեցուած չեն, որը եւ մեծ շփոթութիւն եւ դժուարութիւն է առաջացնում: Օրինակ, պարզ է, թէ միմեանցից ինչով են տարբերուել քնարն ու ջնարը: Գարեգին Լեւոնեանը, որ գրադուել է նուագարանների խնդրով, դարձեալ չի տուել ջնարի վերջնական բացատրութիւնը, ինչպէս եւ գործիքի պատկերը նուագարանների նկարների աղիւսակում⁵:

Տաւիղ եւ քնարի մասին գրաւոր եւ պատկերաւոր վկայութիւններն աւելի որոշ են, իսկ ջնարը, չնայած նրա վերաբերեալ առատ յիշատակումներին՝ տեղ չի գտել մանրանկարիչների աշխատանքներում: Իրաւացի է մանրանկարների ուսումնասիրութեամբ զբաղուած Աստղիկ Գէորգեանը, թէ՛ հայկական երաժշտական գործիքների մանրանկարներից շատերը կամ չեն պահպանուել, կամ էլ մեծ ձեւափոխումների ենթարկուելով՝ կորցրել են մատենագրութեան մէջ յիշուած օրինակների նախկին տեսքը: Այդ իսկ պատճառով ժամանակակիցների համար որոշակի է, թէ հնում լարային ինչ գործիք է եղել ջնարը:

Ջնարի առաջին յիշատակողներից՝ Խորենացին, այն ներկայացրել է որպէս մատնեբով նուագուող գործիք (Քաջամատն ջնարահար)⁶: Սա տեղի է տուել յետագայում նոյնացնելու ջնարն ու քնարը, հիմք ընդունելով «Ջ»ի փոփոխութիւնը Քճի, սակայն ինչպէս գտնում է Հրաչեայ Աճառեանն իր Արմատական Բառարանում, չպէտք է կարծել, որ «Ջնարը»

«քնար» բառի ձևափոխութիւնն է, քանի որ երկուսը միասին կողք-կողքի գործածուել են⁷: Ժ- դարի պատմիչ Թովմա Արծրունին նկարագրել է, թէ ինչպէս արար զօրավար Բուղայի դէմ պատերազմի գնալիս հնչեցրել են փողեր, քնարներ եւ ջնարներ. «Յայն ժամ, հրաման ետուն ամենայն զօրոյն ելանելի պատերազմ եւ ահա աղաղակ եւ փողք եւ քնարք եւ ջնարք եւ վառեալ զնոռ եւ սրոյ եւ ամենայն պատրաստութեամբ...»⁸: Աճառեանը ենթադրում է, որ ջնարը առաջացած է «ջնել»՝ «զարնել» բառից եւ բացատրելով իբրեւ աղբբախ նուագարան, համեմատում է վրացերէն «ճիա-նուր» բառի հետ: Մինչդեռ Վրաստանում ճիանուրին յայտնի է որպէս քամանչատիպ՝ աղեղնաւոր նուագարան, իսկ Արծրունու վկայութիւնը փաստում է, որ ջնարը նուագուել է ռազմի գնալիս, որը բացառում է գործիքի աղեղնաւոր լինելը: Ջնարի եւ ջնարահարների մասին վկայու-թիւններ են թողել նաեւ Գրիգոր Մագիստրոսը եւ Գրիգոր Նարեկացին: Վերջինիս յիշատակած «Ջնարահար պոռնիկ» արտայայտութիւնը յանգեց-նում է այն ենթադրութեանը, որ հնում ջնարը մեծամասամբ նուագել են կանայք- այն հարճերի ձեռքով հնչել է թագաւորների ու իշխանների ար-ջուհիքներում: Մէկ այլ առիթով Նարեկացին յիշում է «ջնար ջահաւորա-կան» արտայայտութիւնը, որը ստուգաբանուել է որպէս Դաւիթ արքայի տասնադի քնար՝ լուսատու եւ դիւահայած⁹: Մեր կարծիքով Դաւիթ ձեռքի քնարն արդէն Աստուածաշնչի թարգմանութեան ժամանակից կոչւում էր սաղմոսարան, որն իր հերթին անկիւնաւոր տաւղի կառուցուածք ունէր: Չգտնելով մանրանկարներում ջնարի պատկերումը, ինչպէս նաեւ պար-զարանումը յետագայ երաժշտագիտական աշխատութիւններում (Գարե-գին Լեւոնեան¹⁰, Սրբուհի Լիսիցեան¹¹), մենք հակուած ենք կարծել, որ ե-րեք գործիքների՝ տաւղի, քնարի եւ ջնարի մէջ վերջինս եղել է ամենահին ձեւը, թերեւս տաւղի սկզբնական տարբերակը, եւ որ տաւղի ու ջնարի մի-ջեւ տարբերութիւնն այնքան էական չի եղել:

Տաւղին ըստ Լեւոնեանի, շատ հին ծագում ունի: Այն հնագոյն լարա-յին գործիքներից միակն է, որ ունենալով երկար կեանք եւ յայտնի դառ-նալով շատ ազգերի ու ժողովուրդների մէջ, այսօր արֆա (arpha) անունով հանդէս է գալիս դասական նուագախմբերում: Գերմանացի գիտնական կուրտ Ջաքը նոյնիսկ նախանշել է տաւղի հայրենիքը՝ Ասորիքը¹²: Եթէ հիմք ընդունենք տաւղի նախակերպարը՝ որսորդական նետն ու աղեղը, ա-պա Ջաքի պնդումը ճշմարիտ է, քանի որ հնագոյն աղեղնաւոր ցեղերն ապրել են Մեռեալ ծովից Սիրիա ընկած տարածքում: Սակայն խիստ վիճե-լի է միանշանակօրէն ընդգծել որեւէ մշակութային երեւոյթի ճշգրիտ հայրենիքը, այն էլ այնպիսի տարածուած նուագարանի համար, ինչպիսին տաւղին է, մասնաւոր գիտակցելով, որ նետ ու աղեղից մինչեւ աղեղնա-ձեւ տաւղին ընկած է մեծ զարգացում: Ըստ Աճառեանի՝ տաւղի բառը

պահլաւական «տարիք» ձեւի փոխառութիւնն է, որի վկայութիւնն է յոյն պատմիչ Հեսիւքոսի մի նկարագրութիւնը, ուր տաւիդը շեփորի նման օգտագործուել է պատերազմում. «Ըստ պարթեւաց այսպէս (tabil- Լ.Մ.) է կոչուում տապակի նման երաժշտական գործիքը, որը պատերազմի մէջ գործածուում են շեփորի փոխարէն»¹³: Պատերազմի ժամանակ տաւիդ օգտագործումը յիշատակուում է նաեւ Հայոց պատմութեան մէջ. «Եւ ոչ այլ ինչ լսէ նա անդ (պատերազմի դաշտում— Լ.Մ.) բայց միայն զձայն տաւիդի բարիեյոյ եւ զհարկանել փողոց»¹⁴: Տաւիդը ջնարի համեմատութեամբ, աւելի ուշ շրջանի պահլաւական փոխառութիւնն է, որ հանդէս է եկել հիմնականում աղեղանման, ինչպէս նաեւ ուղղանկիւն եւ անկիւնաւոր ձեւերով:

Քանոնի միւս նախատիպար՝ քնարն, ըստ Լեւոնեանի, եղել է տաւիդի սկզբնական կառուցուածքի վրայ պատրաստուած եւ համեմատաբար աւելի բարդ նուագարան: Քնարի յիշատակումներն առաւել բազմախօս են Աստուածաշնչի էջերում: Յայտնի է, որ այն խորհրդանիշն է «աստուածաշնչեան նուագարանի»- «Առնէր Դաւիթ զքնարն եւ նուագէր ձեռամբ իւրով» (Ա. Թագ. ԺԶ., 23), ինչպէս եւ խորհրդանիշը արուեստը հովանաւորող աստծոյ նուագարանի: Քնարի շուրջ ստեղծուած ուշադրութեան եւ սիրոյ արձագանգի վկայութիւնն է այն, որ վաղ միջնադարից Հայաստանում «քնար» եզրոյթը հաւաքական անունն է դարձել լարային բոլոր կամիթաւոր գործիքների համար: Արդէն Ժ.-ԺԾ. դարերում այդ բառի ներքոյ Հասկացուել են ոչ միայն քնարն ու քնարատիպ գործիքները, այլեւ առհասարակ սազատիպ, թամբուրատիպ եւ ուղատիպ բոլոր նուագարանները: Սա հաստատուել է Մանուէլ Վրդ. Քաջունու Բառագիրք Արուեստից Եւ Գիտութեանց աշխատութեան մէջ¹⁵ եւ Նոր Բառգիրք Հայկազեան Լեզուի աշխատութիւնում¹⁷, որոնք «քնարը» մեկնել են որպէս «ջնար, կիթառ, տաւիդ, սաղմոսարան, փանդիւն, բարբուտ, նուագարան բախողական՝ աղեօք կամ լարիւք եւ թելիւք կազմեալ յայլ եւ այլ ձեւս, սանթուռ... թամպուռ» եւն.¹⁸: Աճառեանը ստուգաբանելով «քնար» բառը, գտնում է, որ այն ունի ասորա-սեմական ծագում եւ որ Հայերին Հաւանաբար անցել է ասորիներից:

Ընդհանուր առմամբ ներկայացնելով քանոնի նախատիպերը, նշենք, որ բոլորն էլ եղել են մինչեւ տասի հասնող աղիքէ լարերով:

Ե. դարի առաջին կէսին, Աստուածաշնչի թարգմանութեան միջոցով, Հայոց կեանքում ընդհանրացել է քանոնատիպ գործիք նշանակող նոյնպիսի մէկ այլ եզրոյթ՝ «սաղմոսարան»: Սկզբունքօրէն սաղմոսարանը եռանկիւն եւ ուղղանկիւնաձեւ տաւղանման գործիք է եղել, որը տաւիդի նման լարուել է որոշակի ձգուածութեամբ՝ կապուելով շրջանակին: Արեւմտեան գրականութեան մէջ նոյն ձեւով առաջ են եկել հրէական «asort»-ին եւ «nevel»-ին համապատասխանող անուններ՝ psalterion եւ psalterium

decachordum: Աստուածաշնչի հայերէն թարգմանութեան մէջ դրանք յիշատակուած են «քնար», «սաղմոսարան» եւ «տասնադի սաղմոսարան» ձեւերով: «Սոստովյան եղերուք Տեառն օրհնութեամբ, տասնադեալ սաղմոսարանաւ սաղմոս սասցէք նմա» (Սաղ. ԼԲ-(ԼԳ-), 2): Այդ ժամանակից սկսած սաղմոսարանը (արեւմտեան մի շարք ժողովուրդների մօտ՝ պալատերիոնը), մատենագիրների, յետագայում մանրանկարիչների կողմից մշտապէս յիշատակուած եւ պատկերուած էր Դաւիթ Մարգարէի հետ որպէս նրա նուագարան: Չնայած սաղմոսարանների արտաքին տարբերութեանը եւ առաջինի կնտնտոցով եւ երկրորդի կամիթային արտայայտչաձեւերին՝ երկուսն էլ նոյն տասնադի նուագարաններն են: Դրանք երաժիշտը բռնում է ձախ ձեռքով գործիքի ներքեւից եւ աջն անց է կացնում գործիքի իրանի վրայով: Առաջինն աւելի յարմար պահելու համար ունի նաեւ բռնակ: Քանոնատիպ նուագարաններից քանոնին ամենամօտն ու հարազատն անտարակոյս եռանկիւնաձեւ սաղմոսարանն է (անկիւնաւոր տակիր), որն ունի իրանի վրայ անցքեր եւ նուագուած է յատուկ յարմարանքի (մեղիատորի) միջոցով:

Քանոնի առաւել ստոյգ, արդէն հենց քանոն անուանմամբ եւ այսօրուայ ձեւը կանխորոշող պատկերմամբ, յիշատակումները կապուած են զարգացած աւատատիրութեան շրջանի պատմիչների ու վկայագիրների հետ: Մինչ այդ չպահպանուած տեղեկութիւնների բացակայութիւնը թոյլ չի տալիս պարզել հայոց կեանքում քանոնի վերջնական տեսքին հասնելու ուղին: Այն կարող էր կա՛մ կատարելագործուել եւ մեծ զարգացում ապրել սաղմոսարանից, եւ կա՛մ մուտք գործել Հայաստան որպէս այլ երկրներում արդէն կազմաւորուած եւ պատրաստուած գործիք: Աւելի շուտ հակուած ենք երկրորդ տեսակէտին, քանզի սաղմոսարանը եկեղեցում օգտագործուող նուագարաններից էր, իսկ քանոնը՝ աշխարհիկ կեանքում մեծ կիրառում ունեցող գործիք¹⁹:

ԺԳ. դարի փիլիսոփայ Յովհաննէս Երզնկացի Պլուզը, ԺԵ. դարի տոմարագէտ Յակոբ Ղրիմեցին իրենց տոմարներում փորձել են համեմատութեան տեսանկիւնից պարզել բազմալար անկոթ նուագարանները: Ղրիմեցին նոյնիսկ իր մեկնութեան մէջ մանրամասն նկարագրել է տասնադի «քնարը», 40-լարանի «սանդիրը» (սանթուր), 70-լարանի «ղանոնը» (քանոն), 100-լարանի «արղանոնը» եւ դրանց լարման կերպը²⁰: ԺԱ. դարից սկսած հայ ժողովրդական գործիքային երաժշտութիւնը զարգացման լայն հունով է ընթացել, որի զագաթնակէտը եղել են ԺԸ.-ԺԹ. դարերը՝ յանձին աշուղների արուեստի Գործիքները ոչ միայն հանդէս են եկել երկրորդական դերով՝ երգին նուագակցելով, այլեւ մենակատարումներով: Դեռ Ժ.-ԺԱ. դարերում գուսանների համադրական արուեստում, որտեղ միաւորուել են խօսքը, երգը, շարժումը, դիմախաղը եւ գործիքային նուա-

գակցութիւնը, վերջինս զարգացածութեան շնորհիւ յաճախ անջատուել է եւ ձեռք բերել ինքնուրոյն նշանակութիւն, երբեմն նոյնիսկ ներագըզելով երգային ստեղծագործութիւնների վրայ: Սակայն սուղ են վկայութիւնները՝ թէ իւրաքանչիւր գործիք (քանոնի վերաբերեալ մասնաւորապէս) ինչպիսի երաժշտական «Ֆակտուրա» յով է հանդէս եկել: Քանոնի մասին յիշատակումները մշտապէս սահմանափակուել են նուագարանի արտաքին նկարագրութեամբ, լաւագոյն դէպքում՝ նմանատիպ գործիքների հետ համեմատութեամբ: Յատկանշական է, որ այս ժամանակաշրջանից սկսած գործիքի մասին յիշատակումներ առկայ են նաեւ տապանաքարերի փորագրանկարներում:

Ուշ միջնադարում՝ ԺԶ.-ԺԸ. դարերում քանոնի մասին եւս վկայում են որոշ մանրանկարներ եւ գրաւոր յիշատակումներ: Դրանցից է վենետիկի Մխիթարեանների հրատարակած ԺԷ. դարի ձեռագրերից մէկը, ուր ներկայացուող 4 գործիքների շարքում է «դանոնը» (միւսներն են՝ քնար, սալբիբ եւ արդանոն): Հեղինակները տեղեկացնում են իւրաքանչիւր նուագարանի լարերի քանակի, լարելու անհրաժեշտութեան, մարդկանց վրայ նուագի ներգործութեան, ապա հիւանդներին բուժելու մասին²¹: ԺԸ. դարում Գրիգոր Գապասաքալեանի *Գրքոյկ Որ կոչի նուագարանում*²² համեմատութեան կարգով մեկնաբանւում են մի քանի լարային սեղանաձեւ գործիքներ: Քանոնահարների անունների ենք հանդիպում Արիստակէս քահանայ Հիսարլեանի աշխատութիւնում, որը ԺԸ. դարի արեւմտահայ երաժիշտներին ներկայացնելիս, գրքի «Հայ արուեստագէտին մի մաւր» խորագրում յիշատակում է Քանոնի Մաքսուտին, ինչպէս եւ Քանոնի Համբարձումին (Հիսարլեանը քանոնը կոչում է արաբական քանոն ձեւով)²³:

ԺԹ. դարի ժողովրդական գործիքների մասին պատկերացում կազմելու համար պէտք է նկատի ունենալ գուսանների եւ աշուղների խմբակային եւ անհատական գործունէութիւնը. նրանք - մի շարք աղբիւրների վկայութեամբ - գործածում էին սազ, թառ, քամանչա, դափ, գուռնա եւ այլ նուագարաններ, սակայն ոչ քանոն: Քանոնի շրջիկ՝ գուսանական, թափառական կեանքի մասին տեղեկութիւններն աւելի շուտ կապւում են ոչ այնքան հայկական, որքան արեւելեան կենսաձեւի հետ: Ինչպէս վկայում է Լեւոնեանը, Հայաստանում ԺԸ.-ԺԹ. դարերում խնջոյքներում, հարսանիքներում եւ այլ հասարակական ձեռնարկներում հանդէս են եկել նուագածուների խմբեր՝ «սազանդարներ» (չպէտք է շփոթել աշուղների հետ): Սազանդարների խմբում սովորաբար եղել են չորս երաժիշտներ՝ քամանչահար, թառահար, նաղարա եւ դափ նուագողներ: Նոյնպիսի խմբերում, որ գործել են Թուրքիայում եւ կոչուել «խանանդէներ», նուա-

գել են քանոն, դափ, սանթուր, երբեմն էլ փողային որբեւէ գործիք, յաճախ նաեւ կլարնէտ²⁴ :

Քանոնի եւս մէկ այլ պատկերմանը Հանդիպում ենք Լեւոնեանի մէկ այլ աշխատութիւնում, որը նկարագրելով մի շարք նուագարաններ, դրանց կողքին բացատրութիւններ է տալիս քանոնի, քնարի եւ սանթուրի մասին: Հետաքրքիրն այստեղ այն է, որ Լեւոնեանը քանոնը ցուցադրել է որպէս ուղղանկիւնաձեւ, սանթուրն ու քնարը՝ սեղանաձեւ: Ըստ հեղինակի՝ նոյն ընտանիքին պատկանող երեք գործիքների մէջ մամեարազմալարը քնարն է (Ճական դասաւորուած 145 լար), ապա՝ սանթուրը (Յական դասաւորուած 30 լար), իսկ քանոնը՝ ամէնից սակաւ լարաւորը (Յական դասաւորուած 21 լար): Ըստ Լեւոնեանի՝ ԺԸ. դարի սկզբից քանոնը յայտնի է եղել Կոստանդնուպոլսում, Կիլիկիայում եւ Չմիւռնիայում գործած Հայ աշուղներին: 1880ականներից գալով Կովկաս, նրանք գործիքն առաջին անգամ ծանօթացրել են նաեւ արեւելահայերին²⁵ :

Քանոնի մասին պատմական ստույգ տեղեկութիւններն այսքանով գրեթէ սպառուում են. չեն պահպանուել վկայութիւններ գործիքի կենցաղավարման մասին, նրա դերը ժողովրդական լայն խաւերում: Չեն հասել նաեւ զուտ քանոնային մեղեդիներ, որոնց չգոյութիւնը դժուարացնում է ճշմարտութիւնը այն համոզումին, որ գործիքը պիտի որ եղած լինէր ժողովրդական կեանքի անբաժանելի մասը: Նման պարագայում երբեք քննութեան չի ենթարկուի, օրինակ, սրնգի կամ շուփի դերը, որոնց մշտագոյ առկայութիւնը փայլուն պատկերացնում ենք հայոց կեանքում: Նման պատկերացման հիմնական ազդակն այն մեղեդիներն են, որոնք ժողովուրդը ստեղծել է տուեսալ նուագարանի համար, եւ որոնք դարերի ընթացքում ամրանալով եւ փոխանցուելով սերունդներին՝ այսօր տիպականացել են նրա նուագացանկում: Այսպէս, եթէ սրինգը խորհրդանշուած է հովուականչերով, դուդուկը եւ զուռնան՝ տխուր հոգեպարար եւ հարսանեկան զիլ նուագներով, ապա քանոնի հետ կապուած նման մեղեդային գուգորդումներ չկան: Քանոնի «մեղեդային բնութիւնը» յանկարծաբանութիւնն է (իմպրովիզացիան), որը սակայն ոչ թէ գեղջուկի, այլ բանիմաց երաժշտի մտքի արդիւնքն է: Չգտնելով քանոնին վերաբերող ժողովրդաստեղծ ոչ մի մեղեդի (կարելի է ենթադրել, որ զուտ քանոնային երաժշտութիւն ժողովուրդը չի ստեղծել առհասարակ, կամ ստեղծուածն էլ անհետ կորել է), հակուած ենք կարծել, որ վաղ ժամանակներում քանոնի օգտագործման հիմնական վայրը եղել է ոչ թէ գիւղացու խրճիթը, այլ թագաւորի եւ իշխանաւորի արքունիքը: Այդ իսկ պատճառով քանոնն աւելի չուտ ընկալուած է որպէս համբաւային նպատակներին ծառայող, քան գեղջուկի կենցաղում կիրառուող, նրա անմիջական յոյզերն արտայայտող գործիք: Համբաւային նպատակներով իշխանական միջավայրում գոր-

ծիքի կարգավիճակը ենթադրում է, որ քանոն նուագող երաժիշտը պէտք է ունենար երաժշտութեան ասպարէզում որոշակի գրագիտութիւն: Այստեղից էլ բխում է մէկ այլ ենթադրութիւն՝ քանոնը հիմնականում աշուղական աշխարհի նուագարան է, որի արուեստը պահպանւում էր բանաւոր՝ վարպետից աշակերտին փոխանցման ճանապարհով:

Յայտնի է, որ ցանկացած նուագարանի ազգային հիմքերը «չափաւորելու» համար նախ եւ առաջ հիմնւում ենք նուագարանի համար յատուկ ստեղծուած ժողովրդական մեղեդիների վրայ: Քանոնի համար ժողովրդի կողմից ստեղծուած մեղեդու բացակայութիւնը թոյլ է տալիս նուագարանը հեռացնել Հայկական ազգային արմատներից, համարելով այն «օտարամուտ»՝ տարբեր շփումներից ներթափանցուած, «հիւր եկածի» կարգավիճակ ունեցող, սակայն նոր միջավայրին լաւագոյնս յարմարուած մշակութային երեւոյթ: Գիտակցում ենք, թէ ժողովրդական արուեստում պայմանական է որեւէ նուագարանի Հայրենիքի ճշգրիտ բնորոշումը, եւ որ վերջնական հաշուով խնդիր ոչ թէ գործիքի, այլ տուեալ գործիքով ազգային մտածողութեան վերարտադրումն է: Ուստի եւ քանոնը բնորոշում ենք որպէս արեւելեան նուագարան, որը ներթափանցելով Հայաստան եւ ժամանակի ընթացքում մեծ սէր գտնելով ժողովրդի կողմից՝ վերածուել է Հայաստիպ մի գործիքի, որն այսօր յայտնի է դարձել որպէս «Հայկական քանոն»²⁰: Քանոնի «Հայկական» արտայայտումը²¹ պարտական է միայն Ի. Հարիւրամեակին:

Քանոնը, ըստ Լեւոնեանի, Արաբիայում եւ Թուրքիայում երկար ապրելով անցել է Փոքր Ասիա, որից յետոյ՝ Այսրկովկաս, իսկ այնուհետ ընդունելով այլ անուններ՝ թափանցել նաեւ բալկանեան ազգերի մէջ²²: Մեր կողմից աւելացնենք, որ Անդրկովկասում քանոնը յատկապէս մեծ զարգացում է ստացել Հայաստանում (Վրաստանում այն չկիրառուեց, Ադրբեջանում զարգացումն սկսուեց աւելի ուշ): Դարասկզբին քանոնի անդրանիկ կատարողները եղել են արեւմտահայերը: Դրանցից առաջինի՝ Արշաւիր Ֆերջուլեանի շնորհիւ 1924ից սկսուել է Հայաստանում մեր դարի քանոնի տարեգրութիւնը:

Ամփոփելով նշենք, որ քանոնը Հայաստան բերուած լինելով Արեւելքից, կատարելագործուեց եւ արտայայտուեց այնքան իւրատիպ եւ անկրկնելի, որ ժողովրդական գործիքարանում գտնելով իր կայուն տեղը եւ մշտապէս առաջնորդուելով մեկնաբանման նոր ուղիների որոնումներով՝ շարունակում է ապրել մինչ օրս եւ վայելել մեծ ժողովրդականութիւն:

ԿԱՏԱՐՈՂԱԿԱՆ ԱՐՈՒԵՍ

Քանոնի մշակովթի գարգացման գործում հսկայական նշանակություն ունեցաւ կատարողական արուեստը, որն այսօր ունի հարուստ ավանդներ:

Չունենալով ժողովրդական հարուստ երաժշտական ժառանգութիւն՝ քանոնի պէս նուագարանն իր «քաղաքացիութիւնը» Հայաստանում եւ հայ ժողովրդի մէջ կարող էր հաստատել միայն բարձր կատարողական նուաճումներով: Հայաստանում առաջին կատարողները հանդէս են եկել 1920ականներին, որոնք մեծամասամբ արեւմտահայեր էին՝ Արշաւիր Ֆերջուկեան, Գարեգին Խանիկեան, Նշան Հոպեան, Զաւէն Տերմենճեան, ինչպէս նաեւ Սողոմոն Այթունեան եւ Սաշա Օգանեզաշվիլի²⁹: Այս խմբի կատարողները մէջ եւ ընդհանրապէս Հայաստանում առաջին քանոնահարը եղել է Արշաւիր Ֆերջուկեանը (նոյն ինքը՝ Արա Սեւանեան, որը յետագայում տեղափոխուել է ԱՄՆ): Սիրող երաժշտի իր փորձով Ֆերջուկեանը ժամանակի կատարողների մէջ աչքի է ընկել իր նուագի վիրտուոզութեամբ եւ անկաշկանդ փայլով: Քանոնի իր պատրաստուածութիւնը կատարելագործելով Վարդան Բունիի (1888-1980) «Արեւելեան նուագախումբ»-ում, որպէս մենակատար նա մասնակցել է 1939ին Մոսկուայում կայացած հայ գրականութեան եւ արուեստի առաջին տասնօրեակին: Իր ստեղծած «Հայկական Փանտազիա»-յով աչքեցրել շատերին, այդ թւում Ստալինին, որի կողմից պարգեւատրուել է մեծ մրցանակով³⁰: Քանոնի առաջին կատարողներին բնորոշ է եղել արեւելեան ոճը, որն արտայայտուել է յանկարծարանական հիմքով կառուցուած ստեղծագործութիւններով, նուագացանկում մեծ տեղ յատկացնելով մուղամներին: Հայ երաժշտութեան գանձարանից վերարտադրուել են մեծ մասամբ աշուղական արուեստի՝ Սայաթ Նովայի, Զիւանու, Շերամի եւ այլոց երաժշտութիւնը, որոնց կողքին համեստ տեղ են ունեցել կոմիտասեան որոշ նմոյշներ եւ բուն հայկական ժողովրդական մեղեդիներ: Գործիքի համար յատուկ գրուած գեղարուեստական բարձրորակ ստեղծագործութիւններ դեռեւս չկային, այդ պատճառով քանոնի ավագ սերնդի կատարողական արուեստն առաւելապէս դրսեւորուել է համոյթային եւ նուագարմբային ոլորտում, որտեղ քանոնի դերը հիմնականում կատարուող մեղեդու կրկնօրինակումն էր: Այս դէպքում արդէն խօսք լինել չի կարող գործիքի մասնայատուկ օգտագործման մասին:

1920ականների կատարողական արեւելեան ոճին նպաստել է հենց գործիքն ինքը: Կառուցուած լինելով ոչ տեմպերացուած ձայնաշարով՝ այն լաւագոյնս դրսեւորուում էր մուղամներում (իւրաքանչիւր ձայն (տոն) բաժանուած լինելով կիսատոնից փոքր տոներով, թոյլ էր տալիս ձայնի տատանողական՝ վիբրացիոն արտայայտում, որը մուղամի «բնութիւնն» է):

1920ականների կատարողական արուեստի զարգացմանը թերեւս նպաստէր գործիքի կատարելագործումը, որի իրականացումը մօտ էր, քանի որ Հենց այդ ժամանակ ծաւալուեցին Վարդան Բունիի՝ ժողովրդական գործիքների բարենորոգչական աշխատանքները: Լինելով մեծ բարեփոխիչ թառի, սագի, քամանչայի, դուդուկի ոլորտում՝ Բունիի բոլորովին չանդրադարձաւ քանոնին: Միզուցէ նուագարանն ընդունելով գուտ արեւելեան համակարգում, ստեղծագործութիւնների մեկնաբանումը նրանով, համարում էր լաւագոյն եւ ճշմարիտ տարբերակը:

Բնորոշելով 1920-50ականների քանոնի կատարողական արուեստը՝ նկատում ենք երկու կարեւոր առանձնապատկութիւն՝ նուագակցութեան շրջանակներում ունեցած դերը՝³¹ եւ «արեւելեան» ոճի արտայայտչաձեւը: Կատարողական այդ արուեստը պայմանաւորուած է եղել Հետեւեալ գործօններով.

ա) ժամանակի երաժշտա-գեղարուեստական պահանջները (ընդհանուր հակուածութիւնը դէպի արեւելեան երաժշտութիւնը)³²,

բ) առաջին կատարողները, որոնք լինելով արեւմտահայեր, իրենց հետ բերեցին գործիքը եւ նրա կատարման արեւելեան ձեւը,

գ) գործիքի կառուցումը,

դ) նուագացանկի ընտրութիւնը,

ե) կատարման տեխնիկան (ձեռքերի դիրքը, մատների հարուածը):

Նշուած կէտերից անդրադառնանք վերջինին: Կատարման այն սկզբունքները, որոնցով առաջնորդուում է այսօր սկսնակ քանոնահարը, հիմնաւորապէս տարբերուում են նախորդների կատարման ձեւից: Նրանք քանոնը Հնչեցնելով մատերի «պառկած» դիրքով (թողնում է կարծես լարը կողքից քաշելու տպաւորութիւն), բնականօրէն հեռու են մնացել մի շարք արտայայտման հնարների օգտագործումից (այս դէպքում, օրինակ, բոլորովին չի օգտագործուում բուլթ մատը, որի միջոցով այսօր կիրառուում են բազմաթիւ միջոցներ): Նման կատարման ժամանակ ամենամեծ «բացը» ձայնի թոյլ արտաբերումն է: Կողքից («պառկած») եւ ոչ վերից («ողողահայեաց») հարուածի դէպքում ընդգրկուում են ձայնի ոչ թէ երեք լարերը միասմանակ, այլ դրանցից մէկը (լաւագոյն դէպքում երկուսը): Այսօր էլ արեւելեան մի շարք երկրներում պահպանուում է կատարման նմանօրինակ ձեւը: Միաժամանակ այժմեան կատարողական տեխնիկայում կարեւորուում է մատների պահուածքի սկզբունքային փոփոխութիւնը, որի շնորհիւ գործիքի հնչողութիւնը դրսեւորուում է լիակատար ձայնով:

Ի. դարի կէսին քանոնի կատարողական արուեստը թեւակոխեց զարգացման նոր փուլ, ազգային ոճի, մեկնաբանման մեթոդների ու ինտոնացման հնարների նոր ըմբռնումներով: Կատարողական նոր դպրոցի հիմնադիրը դարձաւ Խաչատուր Աւետիսեանը (1926-1996), որը կարողա-

ցաւ արտացոլել ժամանակի քանոնի նուագի մէջ այն գեղեցիկը եւ նուիրականը, որի ոժին առաջին հերթին ազգային բնոյթի եւ ոգու մէջ էր: Քանոնի կատարողական պրոֆեսիոնալ հիմքը դրուեց 1950ականներին: Հայկական քանոնի կատարողական դպրոցում կարելի է տարբերել երկու ուղղութիւն, որոնցից մէկում գծագրուում է քանոնի արտայայտման արեւելեան ձևն իրեն յատուկ գեղարուեստական միջոցների ողջ բազմազանութեամբ, միևսում՝ ձգտուումը դէպի եւրոպական մշակոյթին մերձեցումը:

Քանոնի կատարողական ասպարէզում 1950 թուականը սահմանագիծը դարձաւ կատարման այդ երկու ձևերի միջեւ՝ ի դէմս տաղանդաւոր երաժիշտ Խաչատուր Աւետիսեանի: 1951ին Բեռլինի երիտասարդութեան եւ ուսանողութեան համաշխարհային Գ. մրցոյթ-փառատօնում Աւետիսեանի փայլուն ելոյթին իր վրայ բեւեռեց աշխարհի ուշադրութիւնը: Այն նաեւ ոգեշնչման աղբիւր դարձաւ քանոնի ասպարէզում նորանոր անունների յայտնութեան եւ հայ կոմպոզիտորների կողմից գործիքի համար գեղարուեստական ստեղծագործութիւնների յորինման: Ժողովրդական գործիքների փուլում մասնակցում էին ՅԱ կատարողներ, որտեղ պէտք է հնչէին քանոնը, գիջակը, կոկլէն, բալալայկան, սանթուրը, պարկապուկը, ծնծղաները եւն.: Աւետիսեանը ծրագրը կազմել էր իր փոխադրած Մոցարտի («Ռոնդօ»), Գրիգի («Անիտրայի պարը»), Սայեաթ Նովայի («Էշխեմէդ») եւ սեփական ստեղծագործութիւններից («Էջապրոմտ») եւ «Հայկական Փանտաղիա»), որոնց անգերազանցելի կատարումը ստիպեց դատակազմին արտայայտուել հետեւեալ կերպ. «Պէտք է առանձնացնել Խ. Աւետիսեանին, նոր միայն յաջորդ տեղերը յատկացնել յաղթողներին: Ես երբեք նման կատարում չեմ լսել»³⁸: Կատարողական նոր դպրոցը հիմնուեց գործիքի դասականացման վրայ, որի երկու կարեւոր պայմանները հանդիսացան գործիքի կատարելագործումը եւ դասական ժանրերում քանոնի համար յատուկ գրուած ստեղծագործութիւնները: Աւետիսեանի միջոցով իրագործուած քանոնի լարքի փոփոխութիւնը եւրոպական տեմպերացիայի սկզբունքով, հիմք դրեց գործիքի կատարողական արուեստում «եւրոպական ուղղութեանը» եւ այդ ոլորտում գեղարուեստական երկերի (կոնցերտներ, սոնատներ, պիէսներ) ի յայտ գալուն: Գործիքով ազգային եւ ժողովրդական երաժշտութեան արտայայտման լաւագոյն միջոցը դարձան կոմիտասեան նմոյշների եւ ժողովրդական երգերի փոխադրումներն ու մշակումները:

Նոր հիմնուած կատարողական համակարգում նկատուեց քանոնի արտայայտչամիջոցների աւելի ու աւելի ընդլայնում, եւրոպական տեխնիկայի համակողմանի հնարներով հարստացում: Այն 1950ականներին քանոնային արուեստը դուրս բերեց մի նոր ասպարէզ, որտեղ միաձուլուեցին

Ժողովրդական գործիքի ու դասական երաժշտութեան սկզբունքները: Ստեղծուեցին մի շարք փոխադրումներ եւ մշակումներ (յատկապէս Ղու-
 թակի վիրտուոզային երկերի նուագացանկից), ինչպէս նաեւ քանոնի հա-
 մար յատուկ ստեղծագործութիւններ եւ փոխադրութիւններ: Դրանցից է-
 ին Նիկոյո Պագանինիի (1782-1840) վարիացիաները՝ «Վենետիկեան դիմա-
 կահանդէս»ի թեմայով, Պարլո դէ Սարասատէի (1844-1908) «Գնչուական
 մեղեդիներ»ն ու Կամիլ Սեն-Սանսի (1835-1921) «Ինտրոդուկցիան»ն եւ
 «Ռոնդօ կապրիչոզօն», Անրի Վիետանի (1820-1881) «Տարանտելլան», Ման-
 ուէլ դէ Ֆալլայի (1876-1946) «Իսպանական պար»ը եւն., բուն քանոնի
 ստեղծագործութիւններից՝ Գրիգոր Հախինեանի (1926-1991), Արամ Սա-
 թուեցի (1913-1990) կոնցերտները, էրիք Յարութիւեանի (1933) «Alleg-
 ro»ն, Խաչատուր Աւետիսեանի «Սկերցօն», «Սոնատ»ը, «Սոնատ-Փանտազ-
 իան», Ստեփան Զրբաշեանի (1917-1973) «Կոնցերտինօն», Մովակ Համբար-
 ձումեանի (1923-2001) «Տրայպիզոնցիների պար»ը եւն.: Նշուած ստեղծա-
 գործութիւնների վերտառութիւններից չպէտք է միանշանակօրէն դատել,
 որ քանոնը զուտ վալրագ տեմպերի ու ռիթմերի արտայայտիչ է: Գործիքի
 կատարողական երկացանկում լայն կիրառութիւն ունեն նաեւ քնարական
 ապրումների ստեղծագործութիւնները, ինչպիսիք են, օրինակ, Ալեք-
 սանդր Շահրազեանի «Անուրջներ»ը, Աւետիսեանի «Յուշեր»ը, «Տաղ»ը,
 «Դանդաղ պար»ը, «Երգ առանց խօսքի»ն, Երուանդ Երկանեանի (1951)
 «Տաղ աշնան»ը, փոխադրութիւններից՝ Կոմիտասի «Անտունի»ն, «Ջինար
 ես»ը, «Կուռնկ»ը, «Գարուն ա»ն եւն.:

Վերը նշուած քանոնի կատարման երկու ուղղութիւնների՝ «արեւել-
 եան»ի եւ «եւրոպական»ի միջեւ պէտք է տարբերել, որ «հայկական»ն այս-
 տեղ զրսեւորուեց հենց «եւրոպական» ձեւի մէջ: Այս ոլորտում ի յայտ ե-
 կաւ հայկական քանոնի իւրատիպութիւնը եւ տարբերութիւնն այլ մշա-
 կոյթների քանոնային արուեստներից: Այսինքն՝ քանոնը մեզ մօտ, շնոր-
 հիւ կատարողական նոր դպրոցի, Ժողովրդական ոլորտից «թուիչքածեւ»
 անջատուելով, առաւելապէս մերուեց պրոֆեսիոնալ աշխարհի երաժշտու-
 թեանը: Գաղտնիք է, որ Ժողովրդական գործիքի դասականացումը (եւրո-
 պականացումը) ունի իր «բաց» կողմերը: Հասկանալի է այն մտավարու-
 թիւնը, որն այս կողմնորոշման մէջ կարելի է տեսնել. գործիքի բնական
 հնարաւորութիւններին եւ կոչմանն անյարիր երկփեղկուածութիւն, ինչ-
 պէս նաեւ դասական երկի հնչողական, տեմբրային ոլորտի խաթարում:
 Մի բան է, երբ կոմպոզիտորը ձեռնամուխ է լինում ստեղծագործութեա-
 նը, նախօրօք հաշուի առնելով գործիքի հնարաւորութիւնները, մէկ այլ
 բան՝ երբ դասական ամէնից «ոլորուն» ստեղծագործութիւնները փոր-
 ձւում են նոյնութեամբ մեկնաբանուել քանոնի կատարմամբ: Վերջինիս
 դժուարութիւնը, բացի կատարման տեխնիկայից, նաեւ ձայնարտա-

բերման մէջ է, որի խախտումը ակամայից ստեղծագործութիւնը ներհայեցողական ոլորտից փոխադրում է շօշափելիի սահմանները, թուլացնում ներքին ապրման ուժը: Այս դէպքում կատարողից պահանջւում է արտա-յայտչականութեան առաւել ընդգծւածութիւն եւ մեծ երաժշտականութիւն՝ դասական երկի եւ գործիքի «տեմբրերը» միաձուլելու համար:

Կատարողական նոր դպրոցը հիմնուելով Աւետիսեանի կողմից, այնուհետեւ փայլուն նուաճումների հասաւ շնորհիւ Անժելա Աթաբեկեանի, Յասմիկ Լէյլոյեանի, Ալվարդ Միրզոյեանի, Անուշ Կիրակոսեանի, ինչպէս նաեւ Ծովինար Յովհաննիսեանի ու Մարինէ Ասատրեանի: Մշտապէս առաջնորդուելով նորարարական ձգտումներով՝ իւրաքանչիւր քանոնահար կատարողական արուեստում ունեցաւ իր ներդրումը: Դառնալով առաջին կին քանոնահարը՝ Աթաբեկեանը (ծն. 1936), իր բացառիկ օժտուած տաղանդով եւ հմուտ ձեռքբերումներով, ոգեւորելով եւ իր ետեւից բերելով քանոնահարուհիների մի ողջ սերունդ, հիմնովին փոխեց քանոնի կատարման մէջ կատարողի ընդունուած կարգավիճակը՝ Լէյլոյեանի շնորհիւ սկիզբ դրուեց (1976ին) քանոնահարուհիների մենահամերգերին: Արդէն հնարաւոր եղաւ բնմում հնչեցնել երկու բաժնից բաղկացած համերգ՝ միայն քանոնի կատարմամբ: Նման քայլի դժուարութիւնը ոչ թէ ստեղծագործութիւնների քանակի կամ մենահամերգն «արդարացնող» ձեւական տեւողութեան մէջ է, այլ կատարողի այն պատրաստութեան, որն ի վիճակի է բացայայտել գործիքի բոլոր հնարաւորութիւնները ու դրանք համոզիչ մատուցել ունկնդրին:

Կատարողական արուեստի զարգացման մէջ փայլուն էլ է ներկայացնում Միրզոյեանը: Նուիրուելով իր գործիքին անհուն սիրով եւ դրսեւորելով երաժշտութեան գաղտնարանները թափանցելու նուրբ ճաշակ՝ նրա մեկնաբանումներն աչքի են ընկնում հարուստ երաժշտականութեամբ: Քանոնի երաժշտութեան պրոպագանդման մէջ իր համեստ, բայց կարեւոր դերն ունեցաւ Կիրակոսեանը: Յատկանշական է, որ նրա շնորհիւ վերջին տասնամեակում քանոնը յաճախ հնչել է ազատագրական պայքարի ելած Արցախ աշխարհում:

Այսպիսով, 1950ականներից մինչ օրս քանոնի կատարողական ասպարէզում նշմարում ենք հետեւեալ կարեւոր կողմերը. 1) գործիքի մենանուագային դրսեւորումը, 2) նրա ժողովրդականացումը, 3) գործիքի ասպարէզում «հայկական ձեւի» հիմնումը:

1. Քանոնի նուագակցող դերի փոխարինումը մենանուագող դերով միայն բնական հոլովոյթ է (այդ դէպքում նոյնը կը դիտուէր նաեւ ուղի կամ քամանչայի մօտ, որոնք այսօր էլ մնում են որպէս մեծ մասամբ համոյթային գործիքներ): Սա խօսում է գործիքի արտայայտչական հարուստ հնարաւորութիւնների եւ իւրօրինակ, հնչող ձայնի մասին:

2. «Ժողովրդականացում» ասելով նկատի ունենք հետեւեալը. քանոնի հետ կապուած գուգորդումներ չեն առաջանում որպէս հայի կեանքում մշտապէս առկայ եւ անբաժանելի մասը կազմող գործիքի (այսինքն՝ ժողովրդական գործիք լինելը՝ իր բուն իմաստով), ինչպէս օրինակ սրնգի կամ դուդուկի դէպքում: Դա առնուազն չէր նկատուում մեր դարաշրջանում՝ մինչեւ 1970-80ականները: Շնորհիւ քանոնահար կատարողների կողմից տարուած գործիքի պրոպագանդման, վերջին ժամանակներում քանոնը թափանցեց ժողովրդական լայն շերտեր եւ գտաւ իր «Ժողովրդական կոչումը»: Այդ պատճառով քանոնը ընդունում ենք որպէս պրոֆեսիոնալ աշխարհից ժողովրդական կեանք եկած եւ թափանցած, այսինքն՝ ժողովրդականացած նուագարան⁸⁶:

3. «Հայկական ձեւը» քանոնի կատարողական արուեստում արտայայտուեց դասական հիմքերով՝ եւրոպական նմուշների փոխադրութիւնների ու դասական ժանրում գրուած ստեղծագործութիւնների միջոցով: Այստեղ սակայն վիճելի է, թէ որքանով է համոզել այդ մեղեդիների հնչողութիւնը քանոնի տեմբրով: Առկայ է մի տեսակ երկուութիւն. արեւելեան տեմբրով գործիքն արտայայտում է արեւմտեան (դասական) երաժշտութիւն, ուստի եւ այս տեսանկիւնից «Հայկական քանոնում» միաձուլում են երկու հիմքեր՝ «արեւելեան» ու «արեւմտեան»:

Ինչպէս ամէն ժողովրդական գործիքի, այնպէս էլ քանոնի արուեստում սրտամօտ ու բնական են հնչում ժողովրդական ոյրտի մեղեդիների վերարտադրումները: Սակայն այս համակարգում թէեւ քանոնի նուագում ազգային ոգին արտայայտելու պահանջով է, որ ստեղծուեցին կոմիտասեան նմուշների փոխադրումները, սակայն նկատենք նաեւ, որ քանոնով կատարուող կոմիտասեան մեղեդիներում (թէեւ հայկական մեղեդին կատարուում է հայի ձեռքով) առկայ է ձայնարտաբերման անյարիրութեան պահը: Կոմիտասը, ողջ կեանքում մերժելով «ճշան ու զոգոսան» տեմբրերը, իր մշակումների լաւագոյն (հայեցի) դրսեւորումը գտնում էր «համեստ ու վեհ» ձայնի մեղմանուշ տեմբրերում: Այս առումով քանոնի «բաց» հնչերանգը չի համապատասխանում կոմիտասի սկզբունքներին (նոյնն է՝ հայեցի դրսեւորմանը): Վերապահումով մօտենալով քանոնի հայ կատարողական ասպարէզում նշուած «աններդաշնակ» կողմերին, գտնում ենք, որ այնուամենայնիւ այն իւրատիպ է, չկրկնուող, ունի իր առանձնապատուկ կերպը, որի վրայ էլ ստեղծուել է «քանոնի հայկական դպրոց» հասկացութիւնը:

«ՀԱՅԿԱԿԱՆ» ԵՒ «ԱՐԵՒԵԼԵԱՆ» ՔԱՆՈՆՆԵՐԸ

Հայկական քանոնի իւրատիպութիւնն ընդգծելու համար զուգահեռ կատարենք հայ քանոնի եւ իր նման՝ արեւելեան ժողովուրդների մէջ մեծ

սէր եւ տարածում գտած գործիքների միջեւ: Հայկական քանոնի «արեւելեան ազգակիցները» բուն քանոններն են՝ մեծ ճանաչում գտած Պարսկաստանում, Թուրքիայում, Արաբիայում, Եգիպտոսում, Ադրբեջանում եւն.: Էական տարբերութիւն չգտնելով արեւելեան քանոնների միջեւ, դրանք ներկայացնում ենք, ընդհանրացնելով պարսկական քանոնի օրինակով (որ այսուհետեւ կ'անուանենք պարզապէս արեւելեան քանոն): Մենք դրանց միջեւ համեմատութիւնը կատարում ենք ոչ այնքան մէկի կամ միւսի առակելութիւնը վերհանելու, այլ իւրաքանչիւրի ինքնատիպութիւնն ընդգծելու միտումով:

Հայկական եւ արեւելեան քանոնի դպրոցների տարբերութիւնը միեւնոյն գործիքի բոլորովին այլ մեկնաբանումների մէջ է, որը բխում է երկու մշակոյթների ազգային տարբեր երաժշտամտածողութիւնից: Սրանով է պայմանաւորուում նաեւ գործիքների արտաքին դրսեւորումը՝ կառուցուածքը, պահելաձեւը: Իրանական «ղանուներ» հայկական քանոնից չափերով մեծ է, քանի որ իւրաքանչիւր ձայնի համար տեղադրուած են հինգ բռնակներ: Հայկական քանոնի բռնակների թիւը 2 է: Իրանական քանոնն ունի 81 լար՝ դասաւորուած 27 եռակի ձայներով եւ հայկական քանոնից տարբերուում է լայն դիապազոնով ($f - d^3$)⁸⁶: Հայկական քանոնի դիապազոնն է՝ $g - d^3$ եւ ունի 72 լար (24 ձայն):

Իրանական քանոնի 5 բռնակների համար օգտագործուում են համապատասխանաբար արտերացիայի հետեւեալ նշանները՝

♭ (բեմոլ) - ձայնն իջեցնում է 1/2 տոն

♮ (բոլոն) - ձայնն իջեցնում է 1/4 տոն (օր.՝ «մի» եւ «մի բեմոլ»ի մէջտեղը)

(դիեզ) - ձայնը բարձրացնում է 1/2 տոն

♯ (սոռեի) - ձայնը բարձրացնում է 1/4 տոն (օր.՝ «դօ» եւ «դօ#»ի մէջտեղը)

♯ ♯ ## (դիեզսոռեի) - բարձրացնում է ձայնը 3/4 տոն (#ից շատ, բայց ոչ կրկնակի #):

Հայկական քանոնի 2 բռնակները համապատասխանում են #ին եւ ♭ին՝ ձայնը տեղափոխում 1/2 տոն վեր եւ վար:

Իրանում քանոնն օգտագործուում է 3 պահելաձեւով. դրուած 1) ծնկներին, 2) յատուկ սեղանին, 3) ազդրերին՝ ծալապատիկ նստած. հին ժամանակներից փոխանցուած մի ձեւ, որը հազուադէպ է օգտագործուում ժողովրդական շերտերում: Հայերի մօտ գործիքն ունի մէկ պահելաձեւ՝ ձախ ծնկին դրուած (ձախ ոտքը աջի վրայ): Անշուշտ, կատարողական արուեստում, գործիքի պահելաձեւն էական չէ, իւրաքանչիւր ձեւում կարելի է հասնել բարձր կատարողական արդիւնքի: Երկու գործիքների սկզբունքային տարբերութիւնը բռնակների մէջ է, որոնցով որոշուում է

քանոնով կատարուող մեղեդու բնոյթը: Հայկական 2 բռնակով քանոնը տեմպերացիայի ենթարկուած գործիք է, որի Հնչիւնակարգը կառուցելով 12 կիսատոնային համակարգում, Հնարաւոր դարձրեց գործիքով արտայայտել եւրոպական երաժշտութիւնը: Արեւելեան քանոնի 5-8 բռնակները թոյլ են տալիս ստանալ կիսատոնից փոքր ձայներ: Արեւելցուն դժուարահաս եւրոպական տեմպերացիան յատկապէս անիմաստ էր ժողովրդական գործիքներով արտայայտելը: Թերեւս 5-8 բռնակների առկայութիւնն արեւելեան քանոնում իւրատիպ տեմպերացիա է, քանի որ հնում բռնակներին փոխարինել է մատը, որը փոխել է ձայնը՝ լարի տարբեր հատուածները սեղմելով: Եւ երբ յայտնուեցին բռնակներով գործիքները, դրանք ծաղրանքով համարոււմ էին «արհեստական», «մեքենայացուած»: Արեւելքում գործիքների նման դրսեւորոււմը պատահական չէ: Ժողովրդական գործիքի իր կոչմանն այն մնում է հաւատարիմ՝ կատարելով միայն ժողովրդական մեղեդիներ, բանաւոր ավանդույթով հասած մուղամները: Իսկ մուղամի ողջ գունեղութիւնը՝ մելիզմներով ու ձայնի տատանումներով, կարող է արտայայտուել միայն տեմպերացիայից դուրս համակարգում: Մեզ մօտ քանոնը, ինչպէս ասուեց, իր ժողովրդական արտայայտչաձեւից բացի զարգացաւ դասականացման ճանապարհով, ըստ այդմ էլ ձեռք բերելով արտայայտչամիջոցների լայն շրջանակ: Միայն այդ միջոցներով հնարաւոր դարձաւ ջութակի եւ դաշնամուրի փայլուն գոհարների նոյնատիպ փոխադրումների իրականացումը: գործիքը յագեցաւ բարդ տեխնիկական հնարներով, ի յայտ եկան յատուկ քանոնի համար ստեղծուած կոնցերտներ, սոնատներ, պիէսներ:

Հայկական քանոնը բազմաձայն գործիք է. բացի ստեղծագործութեան ընթացքում հանդիպող հոմոֆոն-հարմոնիկ հատուածներից մեծ տեղ են զբաղեցնում պոլիֆոնիկ մէջբերումները: Աւելին՝ գործիքը կատարում է պոլիֆոնիկ սկզբունքով մշակուած ժողովրդական մեղեդիներ: Սա մղում է գործիքի արտայայտչամիջոցների էլ՝ աւելի ընդլայնմանը: Այս տեսանկիւնից հայկական քանոնը մշտապէս զարգացում ապրող գործիք է:

Արեւելեան քանոնի վրայ դժուար է ստեղծագործութեան ընթացքում մի քանի անգամ փոխել երաժշտութեան լադը, տոնայնութիւնը, արագաչարժ ձեւով օգտագործել բռնակները, ինչն ամենայն դիւրութեամբ կատարոււմ է հայկական երկբռնականի նուազարանով: Փոխարէնը այն երաժշտութիւնը, որը յարիւր է քանոնի էութեանը, եւ որը լաւագոյնս դրսեւորոււմ է արեւելեան գործիքով, դժուար է իր բոլոր գունային երանգներով արտայայտել հայկական քանոնով:

Հայկական եւ արեւելեան քանոնների տարբերութիւնը սկզբունքային է: Մեզ մօտ քանոնը դասականացուեց եւ թափանցեց այսպէս-կոչուած եւ-

ըուպական շերտեր: Արեւելցու մօտ գործիքը մնաց միայն ժողովրդական ոլորտում³⁸: Լայն է Հայկական քանոնի դրսևերուման ասպարէզը, հարուստ է նրա արտայայտչական զինանոցը, սակայն արեւելեան քանոնի նուագում արժէքաւոր է մէկ այլ երեւոյթ՝ *ճերդաշնակութիւնը*: արեւելեան քանոնը որքան էլ հնչի միաձայն, լսողութիւնը յոգնեցնի միատոնութեամբ (երաժշտութեան ողջ ընթացքում միակ լադի պահպանումը, շեղումների ու պատահական նշանների հանդէս չգալը), նրանում անասելի մեծ է *միաձուլութիւնը*՝ գործիքի տեմբրի ու հնչող մեղեդու միջեւ: Եւ արեւելցին շատ լաւ է գիտակցում միաձուլութեան այդ հսկայ արժէքը: արեւելցի քանոնահարին հնարաւոր է ապշեցնել Պազանինիի եւ Ֆրենց Լիստի (1811-1886) վիրտուոզ գործերի փոխադրութիւնով, սակայն երբեք չհամոզել, որ ճշմարիտը քանոնի արուեստում այդ ուղղուածութիւնն է: Արեւելցին շատ անգամներ շփուելով «դասական քանոնի» հետ՝ փորձեր չի կատարում կրկնօրինակել նրան, մնալով հաւատարիմ իր սկզբունքներին³⁹: Արեւելեան քանոնը կարողանում է ունկնդրին խորասուզել ներհայեցողական աշխարհ, որն է Արեւելքն իր ողջ տարաշխարհիկութեամբ եւ մտասուզմամբ, փիլիսոփայական շերտերով եւ հարուստ գոյներով: Հայկական քանոնի նուագում անսովոր եւ զարմանալի է ունկնդրել Լիստի «Ռապսոդիա»յի, Ֆրեդերիկ Շոպէնի (1810-1849) դաշնամուրային գործերի, կամ Պազանինիի եւ Մէն-Սանսի վիրտուոզ ստեղծագործութիւնների փոխադրութիւնները, սակայն մշտապէս առկայ է հնչող ստեղծագործութեան եւ գործիքի տեմբրի անյարիրութեան մտաւախութիւնը: Գանոնի «բաց» տեմբրը դժուար է մերւում արեւմտեան ստեղծագործութիւններին:

Հայկական քանոնի դասականացումը, թէեւ գործիքին հաղորդեց *հրկուութիւն* (արեւելեան տեմբրով հնչում է արեւմտեան երաժշտութիւն) ու հեռագրեց քանոնն իր արմատներից, այդուհանդերձ անբնական չէր, գրեթէ անխուսափելի էր, քանի որ բխեց հայեցի մտածողութիւնից:

Հայկական եւ արեւելեան քանոնի արուեստներն իրենց տեսակի մէջ առանձնայատուկ են, բոլորովին այլ շերտերի պատկանող, եւ իւրաքանչիւրում առկայ են կատարողական մեծ արժէքներ: Հայկականում դա արտայայտուեց գործիքի դասականացման եւ նրա համար գեղարուեստական բարձրորակ գործերի ստեղծման մէջ:

Արեւելեան քանոնում արժէքաւորը գործիքի «բնութեան» բնական արտայայտչաձեւի մէջ է: Նրա քանոնը օրգանական մեծ կապի մէջ է կենցաղում օգտագործուող մեղեդիների հետ⁴⁰:

Ամփոփելով, նշենք որ չնայած վերջին տասնամեակում քաղաքական-սոցիալական իրավիճակի պատճառով քանոնի կիրառումը Հայաստանում նահանջ ապրեց, որով եւ ետ մղուեց 80ականներին ձեռք բերած մասսա-

յականութիւնը, այն դարձեալ ունեցաւ իր առաջընթացը: Դա են վկայում թէ՛ գործիքաշինութեան (էլեկտրական քանոնի ծնունդը), թէ՛ մանկավարժական (նոր ձեռնարկների հրատարակումներ⁴) եւ թէ՛ կատարողական (նոր արտայայտչամիջոցներ, տեխնիկական դաշտի ընդլայնում) ասպարէզներում երեւան եկած նորոյթները, որոնք ապացուցում են, որ ժողովրդական այս նուազարանը սոսկ պատմական արժէք է, այլ մշտապէս գտնուելով ժամանակի գեղարուեստական հոգեբանական իւրացումների կենտրոնում, հանդէս է գալիս որպէս գործող՝ ասելիքի հնարաւորութիւնները չսպառող միաւոր:

Հայկական եւ արեւելեան քանոնների տարբերութիւնների աղիւսակ

Հայկական քանոն	Արեւելեան քանոն
1. Ունի 2 բռնակ:	1. Ունի 4ից աւելի՝ 5, 6, 7 բռնակներ:
2. Տեմպերացուած գործիք է:	2. Տեմպերացուած չէ՝ եւրոպական հասկացութեամբ. արեւելեան քանոնն էլ կարելի է համարել որոշակի տեմպերացուած, քանի որ բոլոր տոնների (1/2, 1/4) ֆիքսումն առկա է:
3. Ունի 1 պահեւածեւ՝ ձախ ոտքը աջին զցած՝ քանոնը ձախ ծնկին դրուած:	3. Ունի 3 պահեւածեւ՝ 2 ծնկներին դրուած, յատուկ սեղանին, ծալապատիկ նստած եւ ազդրերին դրուած:
4. Բազմաձայն գործիք է:	4. Միաձայն է (կան օկտաւային կրկնապատկումներ):
5. Ստեղծագործութեան ընթացքում հնարաւոր են բազմաթիւ փոփոխումներ լադային եւ տոնայնային առումով՝ բռնակների ակտիւ օգտագործման շնորհիւ:	5. Ստեղծագործութեան սկզբից ստանում է մէկ հնչիւնակարգ, որն էլ պահպանուում է ողջ ընթացքում: Պատահական նշաններն օգտագործուում են հազուադէպ:
6. Նուազացանկում առկայ են թէ՛ ժողովրդական, թէ՛ եւրոպական դասական ժանրերում գրուած ստեղծագործութիւններ:	6. Նուազացանկում են ստեղծագործութիւններ միայն արեւելեան «Ֆոլկլօր» ոլորտից, ներառեալ՝ դասական համարուող մուզամները:
7. Կատարողներն այսօր միանշանակ կանայք են:	7. Մեծամասամբ կիրառուում է տղամարդկանց կողմից:
8. Գործիքը դասականացուց:	8. Մնաց հարազատ ժողովրդական գործիքի կոմանր:

- ¹ Մովսէսի Նորէնացւոյ Մատենադրութիւնք, Վենետիկ, երկրորդ տպագրութիւն, 1865, էջ 50.
- ² Նոյն տեղում, էջ 250:
- ³ Nikoghayos Tagmizyan, *Teoriya muziki v drevney Armenii* (Երաժշտութեան Տեսութիւնը Հին Հայաստանում), Երևան, 1977, էջ 80.
- ⁴ Խաչատուր Աւետիսեան, *Քանոնի Ձեռնարկ*, Երևան, «Հայաստան» Հրատարակչութիւն, 1988, էջ 8 (Նիկողայոս Թաճմիզեանի առաջաբանը):
- ⁵ Գարեգին Լեւոնեան, «Հայ Աշուղներ», *Ազգագրական Հանգէս*, տասներորդ տարի, ժ.Գ. դերք, Թիֆլիս, 1906, No 1, էջ 93, 98.
- ⁶ Ասողիկ Գէորգեան, *Միջնադարեան Երաժշտական Գործիքները Հայ Մանրանկարչութեան Մէջ*, Երևան, 1982, էջ 12:
- ⁷ Հրաչեայ Աճառեան, *Հայերէն Աբստրակտ Բառարան*, Երևան, Երևանի Համալսարանի Հրատարակչութիւն, 1979, Կ. IV, էջ 129:
- ⁸ Տէս՝ Էմմա Խանզաղեան, *Հայկական Հին Երաժշտական Գործիքները*, Երևան, 1959, էջ 74.
- ⁹ Նոյն, էջ 85:
- ¹⁰ Լեւոնեան, «Հայ Աշուղներ», էջ 98:
- ¹¹ Տէս՝ Srubhi Lisitzyan, *Starinnie plyaski i teatralnie predstavleniya armyanskogo naroda* (Հայ Ժողովրդի Հնագոյն Պարերը Եւ Թատերական Ներկայացումները), Կ. 1, Երևան, 1958, էջ 154:
- ¹² Kurt Zaks, *Muzykalnaya kultura Vavilona i Assirii* (Բաբելոնի Եւ Ասորիքի Երաժշտական Մշակույթը), Լենինգրադ, 1987, էջ 105-108:
- ¹³ Աճառեան, էջ 390:
- ¹⁴ Նոյն:
- ¹⁵ Նիկողայոս Թաճմիզեան, «Ձայնի Մասին Ուսումնքը Հին Եւ Միջնադարեան Հայաստանում», *Բանբեր Մատենադարանի*, Կ. 6, Երևան, 1982, էջ 182:
- ¹⁶ Մանուէլ վրէժնի Գալուստի, *Բառքեր Արուեստից Եւ Գեղեցիկ Դպրութեանց*, հատ. Ա., Վենետիկ, 1891, էջ 264, Բ. սիւնակ:
- ¹⁷ Հ. Գարրէիլ Աւետիքեան, Հ. Խաչատուր Սիւրմէլեան, Հ. Միլոտիչ Աւգերեան, *Նոր Բառքեր Հայկական Լեզուի*, հատ. Բ., Վենետիկ, 1887, էջ 1008, Ա. սիւնակ:
- ¹⁸ «Բնար» բառը ժ.Թ. դարում ստացել է երգերի ժողովածուի, դաւթարի նշանակութիւն, ինչպէս՝ «Բնար Մշեցոց Եւ Վանեցոց», «Բնար Հայկական»:
- ¹⁹ Գրիգոր Նարեկացին յիշատակել է սաղմոսարանը եկեղեցում.
«...առաջի նորա մանկունք դեղեցիկ,
ի գիրկս նոցա խաչք տէրունական
ի ձեռին նոցա սաղմոսարան ու ճնար
որք երգէին եւ ասէին՝
Փառք Բրիստոսի ամենազօր յարութեան» (Գրիգոր Նարեկացի, «Տաղ Յարութեան», *Տաղեր*, Երևան, Հայպետհրատ, 1957, էջ 62):
- ²⁰ Աւետիսեան, էջ 4:
- ²¹ Տէս՝ Նիկողայոս Թաճմիզեանի առաջաբանը Խաչատուր Աւետիսեանի *Քանոնի Ձեռնարկում* (էջ 7):
- ²² Գրիգոր Գալպասաբալեան, *Գրքով Որ Կոչի Նուագարան*, Կ. Պոլիս, հրատ. Միլոտիչ Միրիջանեան, 1794:

²⁵ Արխտակէյ քահանայ Հիւարիւան, Պատմութիւն Հայ Զայնագրութեան Եւ Կենսագրութիւնք Երաժիշտ Ազգայնոց, Կ. Պոլիս, 1914, էջ 174-176:

²⁶ Գարեգին Լեւոնեան, Հայ Աշուղներ, Թիֆլիս, 1908, էջ 31:

²⁷ Լեւոնեան, «Հայ Աշուղներ», էջ 98-99:

²⁸ Քանոնի արեւելեան ծնունդը, եթէ փորձենք կոնկրետացնել, մեծ հաւանականութեամբ պէտք է առնել արաբական աշխարհին, իսկ մեզանում գործիքի թափանցումը եւ ամուր խարսխումը պայմանաւորուած է արաբական բազմակի ներխուժումներով, որոնք է-դարում Հայաստանում հիմնաւորուել են երկար ժամանակով: Յայտնի է, որ արաբները եղել են քոչուոր ժողովուրդ, սակայն այլ հետամնաց ժողովուրդներին տարբերուել են նրանով, որ կարողացել են ընդօրինակել իրենց նուաճած ժողովուրդներին շատ բան, յարմարեցրել իրենց եւ անգամ փոխանցել դրանք Եւրոպային:

²⁹ Քանոնի տեքստը, լինելով ճշան եւ ճշգրտ, չի ներդաշնակում հայեցի մտածողութեանը, որի հաւաք արտայայտում տեսնելով արտաքինից համետ եւ «փակ» գեղջուկ երգում, ճշմարիտ արտաբերումը գտնում ենք մեղմանուչ եւ ականջ չոյող տեքստով օժտուած նուազարանի հնչեղանգում: Այս տեսակէտից քանոնը հետու է ազգային չափանիշներին, սակայն կատարողները, ընթանալով ազգային ոգու արտայայտման ուղիով, քանոնին տուեցին հայկական արտայայտման ձեւ. «...բոլոր ազգերն այլ իրեն ազգային նուազարան՝ մէկ գործիք մը կ'ունենան ընդհանրապէս, իսկ միւսները շինուած կամ յարմարեցուած կ'ըլլան անոր վրայ: Հայոց մէջ այդ ազգային նուազարանը փողն է... իր պարզութեան մէջ պարփակուած վեհութեամբ» (տե՛ս՝ Կոմիտաս, Յօդուածներ Եւ Ուսումնասիրութիւններ, Երևան, 1941, էջ 197):

³⁰ Լեւոնեան, «Հայ Աշուղներ», էջ 99:

³¹ Մինչև 1950ականները, արեւելքում ընդունուած ձեւով, Ս. Հայաստանում քանոն սովորում էին միայն տղամարդիկ: Կանանց դերը կատարողական ասպարէզում առաջ եկաւ Յակոբաներից՝ շնորհիւ Անժելա Աթաբեկեանի: Հետաքրքիրն այստեղ այն է, որ երկու սեռերի հաւասարեցումն այս ոլորտում չիրականացաւ. որքան անյարմար էր տեսնել Չոսկաններին քանոնահարուհու, այնքան այօր՝ տղամարդ քանոնահարի:

³² Այս մասին մեզ վկայել են քանոնի վարպետները:

³³ Քանոնի կատարողական դերը բաւական հնացած տեսանկիւնից է դիտարկուել Վերտկովի խմբագրութեամբ լոյս տեսած երաժշտական գործիքների ատլասում, որը հրատարակուելով 1975ին (երբ արդէն երկու տասնամեակ հայկական քանոնն օգտագործուած էր որպէս մենակատար գործիք), յայտնուել է այն միտքը, որ քանոնը յատկապէս վերջերս Հանդէս է գալիս նուազակցողի դերում (տես Atlas muzikalnih instrumentov SSSR (ՍՍՀՄ Երաժշտական Գործիքների Ատլաս), Մոսկուա, 1975, էջ 120-121):

³⁴ Երաժշտութեան ասպարէզում ընդհանուր արեւելեան ուղղութեան դրսեւորումներին է դարասկզբի մի շարք արեւելեան համութների առկայութիւնը, որոնք կազմաւորուեցին Օղիշ Բաղդասարեանի, Գրիգոր Միրզայանի (Միւնիխ), Լ. Վարդանեանի, Ար. Օղիազարեանի, Անտոն Մայիլեանի, Գէորգ Վերդեանի (բօֆիշի), Ներսէս Ղորղանեանի, Է. Յովհաննիսեանի (բօֆիշի), Վլադիմիր Քիչիշեանի, Օգանեզաւիլիու եւ Վարդան Բունիի (Բունիսթեան) կողմից: Վերջին երկուսի նուազախմբերն այս շարքում ամենաճանաչուածներն էին (Գուրգէն Գէորգեան, Մշտա Օգանեզաւիլի, Երևան, 1973, էջ 52):

³⁵ Թերեզա Արազեան, Մշտաուր Աւետիսեան, Երևան, 1973, էջ 14:

³⁶ Անժելա Աթաբեկեանից յետոյ (1960ականներ) քանոնի կատարման ասպարէզում, տղամարդ քանոնահարները նահանջեցին՝ դեկը միանշանակ փոխանցելով կին կատարողներին:

- 35 Յատկապէս 1980ականներին քանոնը ամուր հիմնաւորուեց ժողովրդի կենցաղում: Տողերիս հեղինակն ապրելով Սասունիկ գիւղում (Աշտարակի շրջան), կարող է հաւաստել, որ այդ ժամանակներում քանոն կար գիւղի համարեայ բոլոր տներում:
- 36 Թուրքական քանոնն ունի 24 կամ 25 ձայն՝ ըստ այդմ էլ 72 կամ 76 լար, դիապազոնն է a - c՝ կամ d - f՝: Եգիպտական քանոնն ունի 28 ձայն, եւ դիապազոնն է՝ f - c՝ (տես Մայիւէ Սահլի, *Քանոնի Ուսուցում*, Թեհրան, 1980, պարսկերէն):
- 37 Օրինակ, կոնտրաբասն ունէր աղեղի 3 պահեւածեւ՝ իտալական, գերմանական, ֆրանսիական: Երեք ձեւում էլ գործիքի կատարողական արուեստում գրանցուել են փայլուն նուաճումներ. յանձինս Դոմենիկո Դրագոնեստի (1763-1846, իտալական ձեւով), Կոսելիցկու (գերմանական), Ջովանի Բոտեչինի (1821-1889, ֆրանսիական) (տես Rodion Azarkhin, *Kontrabas* (Կոնտրաբաս), Մոսկուա, 1978, էջ 12):
- 38 Ժողովրդական ոլորտ՝ մեր հասկացողութեամբ, քանի որ մուղամներն արեւելցու համար դասական նմուշներ են. «Նրանք մեծամասամբ նուազում են իրանական կյայիկ (ընդգծումը մերն է - Լ.Մ.) երաժշտութիւնից, ամբողջ Մերձաւոր Արեւելքին եւ Անդրկովկասին ծանօթ մելոդիաներ (չարգեաւ, սեգեաւ, շուր, էյ խաթի, հեյազ, բայաթի շիրազ եւն.):» (Աւոնեան, *Հայ Ազուջներ*, էջ 30):
- 39 Արեւելեան եւ Հայկական քանոնների շփումն ի յայտ եկաւ յատկապէս 1980ականներին՝ Հայ քանոնահարների արտասահմանեան ելույթների շնորհիւ:
- 40 Քանոնն արեւելցու մօտ (ուղի հետ մէկտեղ) մշտապէս առկայ է նոյնիսկ դասական նուազախմբերում:
- 41 Տես օրինակ՝ Յամիկ Լէյլոյան, *Գամմաներ, Արպեջոներ, Կոլուջներ, Վարժութիւններ*, Երեւան, 1995; նոյնի՝ *Փոխադրութիւնների Ժողովածու Քանոնի Համար*, Երեւան, 1995:

THE CANON POPULAR MUSICAL INSTRUMENT (Summary)

LILIT MANOUKIAN

The article is a historical overview of the popular Armenian musical instrument, the Canon.

The author briefly reviews the differences between the Armenian string instruments and narrates the historical development and modifications the Canon has undergone throughout the centuries. Furthermore, the author compares the Canon with similar instruments of Middle-Eastern and far-Eastern origin (Arabic, Iranian, Chinese, etc.) from the musical perspective. He also compares the way they are played, the musicians who play them and the circumstances in which they are played.

Moreover, the author highlights the limitations of the instrument with regard to the type of music and compositions played, and its unprecedented development in Armenia in the twentieth century, which brought in a shift from male to female players.